

Cietbaeuhraemx:

Ngoenzciet Conzdungj Hoenghhwd Dwzangzcuz

德昂族盛大的传统节日——泼水节

□ Mangzi ingi Siobvungz boiz



▲ Baiq baed caiq rwed lungz, mbaenj vuenyungz bingzan.

◀ Baeuhraemx caen mizyinx, gyoengqvunz angqyangz raeuh.



▲ Caensim caez baiq baed, maqmuengh saedcej ndei.



▲ Ngoenzciet hozdung lai, gyong rongx caiq gofoux.



▲ Dinfwngz daemjrok dem dajsiuq, roxyiuj sugsed daihdaih cienz.



▲ Ngoenzciet doxcaeh bae aeu raemx, cij gouz faenh sim dem angqyangz.

Moix bi ciet cingmingz gvaq geij ngoenz le, guek raeuz Yinznanz Swngj gyoengq beixnuengx Daijcz Dwzangzcuz daengj saujsu minzcuz doengh dieg Dwzhungz、Sihsangh-banjnaz haenx caeuq gyoengqvunz Daigoz、Genjbujcai、Menjden daengj guekgya cungj angqyangz hoenghhwd gvaq cietbaeuhraemx, ngoenz haenx gyoengqvunz oenghom caemxdang, cangndang moqsup lwenqda, raek-daiq gijwn huqcaeq bae daengz ndaw miuh, cingj saenz caemx baed, aeu gij raemx siengcwngh gitndei haenx doxbaeuh hoh fuk, ciengz-mienh nauhyied raixcaix.

Cietbaeuhraemx Dwzangzcuz dieg Dwzhungz Couh dwg moix bi cietcingmingz gvaqlaeng ngoenz daihcaet hainduj, itbuen lienzdaemh gvaq 3 ngoenz, aenvih ngoenzciet miz gij hozdung bae gwnz ndoi mbaet vamoq, ndigah youh heuhguh "cietmbaetva". Ngoenzciet geizgan, ndaw mbanj beixnuengx Dwzangzcuz sing gyongdinciengh yiengjdungdung, sing go sepsek haprwenz. Ngoenz daih'it haetromh, gyoengqvunz Dwzangzcuz couh daenj dwk gyauegetget riuj aenlamz hwnj ndoi mbaet vamoq, ndaw lamz cang rim le, gyoengqvunz couh naengh youq gwnz ndoi yietnaiq ganggoj, seizneix, ciengzciengz couh miz sing gyongdinciengh caeuq sing lazmagz yiengi hwnjdaej, daihgya cix angq dwk diuj hwnj foux-dinciengh caeuq fouxgungjcoz, cig-daengz daenggoenz doekbya le cij angqangq riuriu maranz, daengz ndaw mbanj le gyoengqvunz lij doxsoengq gij vamoq mbaet ma haenx, hoh beixnuengx gitndei vuenyungz, bingzan doxhuz, caemh-caiq aeu vamoq nyub raemx le rwed hwnj gwnz siengqbaed bae swiq faenx, lij dawz baenz gaem baenz gaem vamoq baek roengz guenqva caeuq gwnz led ndaw gyanghongh bae. Doengxhaemh, gyoengq boux-

coz doxcomz youq giz ndeu, angqyangz dwk ciengq go diuj foux, gij heiq ngoenzciet cw doh mbanjbya. Ngoenz daihngaih dwg ngoenz ceiq nauhyied cietbaeuhraemx. Haetromh, gyoengqvunz couh cangndang moqsupsup, gyoengq dahsau lij genj aeu duj vamoq ceiq lengj baek youq gwnz gyauej, daihgya daiq ceizhaeuxcid、geizfan、yienglab daengj doxgaiq caeqbaiq, soengq daengz ndaw miuh caeqbaiq saenz-baed. Seizneix, gyoengq saimbwk saenq baed haenx naengh youq ndaw miuh dingq goengbaed ngon ging, gyoengq mehmbwk lij dawz gij raemx aeu vamoq cimq gvaq haenx faet hwnj siengqbaed bae, heuhguh bang baed swiq faenx. Riengzdwk banh aen yizsi baeuhraemx, sien youz boux vnzlaux ndeu daj ndaw mbokraemx aeu gaem vamoq nyub raemx gvaq ndeu okdaej, faet raemx coh gyoengqvunz seiqhenz. Ciepdkw, gyoengqvunz youq ndaw sing gyongdinciengh gyukgyad haenx yaengx mbokraemx hwnjdaej, ndik raemx hwnj gwnz fwnz gyoengq vnzlaux bae, hoh vnzlaux ndang rengz souhyienz. Yizsi banh sat le, gyoengqvunz couh riengzlaeng aendoih gyongdinciengh, daej daengz henz mboq, henz dah, hainduj angqyangz dwk doxcaez baeuhraemx hwnjdaej, seizneix caenh raen raemx sinz daengz byongh mbwn, vnz youq ndaw raemx buet, nauhyied raixcaix. Ngoenz daihsam dwg gyoengq bouxcoz angqyangz seizgan, gyoengqde doxiu gap doih baeuhraemx gvaq le, couh foenxfoenx ra youx doxlien、gangj gyaenz dwen ndiep, daj giz gyaenz yaj bae, caenh raen gwnz ndoi henz dah, roxnaeuz haj roek boux guh doih, roxnaeuz baenz doiq baenz sueng, lumj baenz duj baenz nyup vamoq nei sanq youq rogdoengh, ndeiyaewj dangqmaz.



▲ Caez diuj "fouxgyongraemx", mbauqsau caemh angqyangz.



▲ Ciep baed okdaej guh caeqbaiq, daengx mbanj vnzlai cungj camgya.



▲ Mehmbwk Dwzangzcuz cang lengj, rog doengh seiqlengq lumj va hai.